

Meshangarh Vengbuk Zing Tongtai Pawlhai Inhawi an Ti Hle

Unau Meshangarh Vengbuka zing tongtai pawlhai chu tulai hin Pathien thlarau malsawmna nasatakin an dawng niin chanchin ei dawnga. An zing tongtai aina a hin hei chit-chit le hla bova lam a lung deu zinga, chu chau chu niloin Pathien thu tha tak tak nitina an I hmuthar hai hrlina le ngaithlakna an nei hlak a, hlasak inhawi an ti hle hlak bok a nih. A tira pei beklo le en thlithlai malam ti deua thang hai khawm tuhin chu zing trongtrai thrang naw (absent) inlau el khawm vengbuk membershai lai an um tah a hriet a nih.

Abiktakin kum upa tieng deuhai an thawk nasa bik deua hriet a nih a, thuthar hlathar hlawk tho dawka zuk hmu thar a nei an um deu ran baw, inhawi an ti tlang hle a, a chang chun sin fe ding inhmaw deuhai an lo tin a, a danghai chu centre-a sawt tak tak an cham chang a bo nawh. Zing dar 8:30-a an tan chu dar 10:30 chen dam an kai hlak a nih. A then office kai ding, ka tongtai ai hmannaw khawm a hlasak po le min thuthar an dawng hai an hrii bek ka ngai hman khawmin ka hlawk ta tho tho tia, an office fe tawma centre la pan tawt tawt khawm an um nuk hlak bok a nih. Chun, zing tongtai hun a Pathien inpak a hlasak chu ditkhawp loin, in-ah an la sunzawm deu zie hlak bok a nih.

Munirka Vengbuk Rongbawlna Threnkhat

Munirka Vengbuk secretary Tv. Ezekiel Keivawma a inthoka chanchin ei hriet danin Munirka vengbuk sunga rongbawlna chu a fe thra peia, tuta term sung khawm activities thrahnem takel an nei thei ta niin chanchin ei dawng. Activities threnkhat an nei ta le an nei mekhai a thlawma zawng hang tarlang ei tih:

1. Munirka vengbuk House visit le intin ta dinga tongtai pekna nei zing anih.
2. Munirka vengbuk fund drive na dingin-
 - (a) Second hand boxer hawng anih
 - (b) Dishwash siema center a siin, zawr zing anih.
 - (c) Sa hminsa zawr anih.
3. Munirka vengbuk damnawhai kanna le Pathien kuoma tongtai pekna nei anih.
4. HCFD Centr, Munirka a sietna um hai siemthatna le sukfaina tarik 05.08.2023 khan nei anih a, white -washing le painting thaw tharin social work (Tlangsin) Munirka OBs-hai le membershai iemanitaw fekhawmin nei anih. Munirka vengbuk rongbawlna Lalpan malsawm pei rawsen.



An Organ of the Hmar Christian Fellowship Delhi

HREPUITU

HREPUITU | VOLUME: XIX | ISSUE: 5 (AUGUST, 2023)



Please visit HCFD official website:
<https://hcfid.in/>

HREPUITU

Hmar Christian Fellowship Delhi
Chanchinbu Thlakip Suok
(Regd.No.: S/ND/599/2015)
Vol. XIX/No. 5 (August, 2023)

Managing Editor:

Pu Herbert Lalsanglur

Joint Editors:

Pu Rohminglien Songate

Pastor Steven Lalzarzolien
Infimate

Printing/Circulation:

Pu Robert Penatu

Address:

Managing Editor, Hrepuitu,
Fellowship Centre, Base-
ment, H. No. 57, Munirka,
Delhi- 110067

email: hrepuitu@yahoo.com

Hrepuitu a article insuo hai,
ngaidân suklanga um (hai)
hi HCF Delhi ngaidan a(n) ni
chuong kher nawh. Ziektu tin
mawphurna a ni lem. Pathien
thu le article insuo nuomhai
chun iengtiklai khawma edito-
rhai email ah thu ziek hai chu
pek thei zing a nih.

- Editor

A SUNGA THU UMHAI

03 EDITORIAL

04 TITANIC LE A SEVÊ- LA LAWNG PATHUM

08 KA PALAI HAI CHUNGTIENG AN UM SI A

09 KRISTA LUNGPUI CHUNGA REM

11 HARSATNALE LUN- GNGAINA HMUNAH PATHIEN EI BEL HLA K DING A NI

16 SHIKOHABAD MIS- SION FIELD REPORT

16 TUOLSUNG CHANCHIN

zâra dam chun ei la thaw pei tum a
nih. Ei mamaw êm êm guitar man
ding Vasant Kunj Vêngbuk Inkhawm
a inthok chêng Rs. 12000 ei dong a ni
thu kha ka la hung hrilsa vat. Thralai
an um bêk naw leiin naupang le tle-
irawl ruol fiel khawma thawpui ding
tiin trongtraina leh ei inbuotsai zing a
nih.

A chung a ei hung târlang hai
hi tu chena ka rongbawl dân tâlângpui
hai chu an nih. HCFD fethlenga In-
dia a vai kulmuthai tamna hmun taka
Thlarau ralthuom chawia Chanchin
Thra rongbawl na ka nei thei hi ropui
ka ti hle a nih. Khawvêl tieng hriet-

na le varna konga mi tam tak tluk
naw lang khom ka talent neisun hai
Lalpan nasa takin a hmang thei ti hi
a tîr a inthok khan ka ring tlat a nih.
Vai laia khawsa ding chun ka'n nê-
m taluo deua, trongbau khom ka thiem
naw hlea. Kut sinthawna konga khom
hmang tlâk lo tak niin ka tlinnawna
tam tak um sienlakhom May tarik 4 a
inthok July tarik 27 chen a kut hrâtin
a mi thruoia a mi huolhim leiin Lalpa
a mi kotu'n ei lawmthu popo chang
raw se.

LALPAN Shikohabad ah ei
rongbawl na malsawm thar pei raw se.

QUOTES

“Relying on God has to start all over everyday, as if nothing has yet been done.”

-C. S. Lewis.

“Cruelty and wrong are not the greatest forces in the world. There is nothing eternal in them. Only love is eternal.”

-Elisabeth Elliot.

“God is most glorified in us when we are most satisfied in Him.”

-John Piper.

“You never know how much you really believe anything until its truth or falsehood becomes a matter of life and death to you.”

-C S Lewis.

“My entire theology can be condensed into four words. Jesus died for me.”

-C.H. Spurgeon.

“You are the only Bible some unbelievers will ever read.”

-John MacArthur.

“Keep faith. The most amazing things in life tend to happen right at the moment you're about to give up hope.”

-Anonymous

hrilna hun a hung tlung chun Pi Sum-anin an lawiin nenetui a nei tâk thu a hril a. Ka lungril a tawk takzet a, ran e ti lo chun Pathien sinthaw hi ropui ka ti taluo leiin ka mitthli an lêng met a nih. Chuong ang chun house visit hmun dang dang a hai khom kan nei hlak. Voikhat kha chu hmun hla deuah kohran member threnkhat hai thruoiin outreach kan va nei bok.

3.Naupang Sunday School: Naupang Sunday School hi July tarik 16 khan kan lo tran tah. Kan thaw dân chu puitling lai praise & worship kan thranga, testimony sharing na hun kan nei zo hin naupang hai thruoiin biekin entrance lai carpet phain kan inthrong khawm hlak. Kan hun hmang ding le thawlawm chawi khawm hai inhlân-nan kan tran a, chu zoin hla dam kan sak a, Bible châng inzawtin kan in baihât tir a, Bible story dân kan tiem pêkin kan hril hlak bok. Naupang hi 20 chuong kan um hlak a, thafan an um thei hle. Attendance kan lâka, a'n khawm rawn tak lawmman kum tawpah pêk kan tum a nih. Lawmman dang danghai khom siem pei ding ti a nih. Hmatieng hunah Lalpan rem a ti chun activities dang dang hai khom a remchàng ang peiin inchuon sa pei ei tum bok.

4.Zântieng Tuition: Tu kum sâng po chu kohran mi le sahai lan hmêlhrietpuia, muongchâng-naupang tuition thaw dân ding la ngaituo ei tum leh kohran nu le pa han

tuition chuongchâng an hung ngaiven zing hlaka. Asanchu Pu Pramod in kohran hai kuomah a lo hril ta hlak lei a nih. Chuleiin July thlaa tran dingin kan insiem a. Sienkhom hmangruo hai iengkhom a la um naw leiin a trûl trûl inchawin ei lâk khawm a. Pathienin ei mamawhai mi pein July tarik 16 zantieng dân 4:00 pm in Shikohabad Tuition chu ei lo tran an tah. A ni khat niin mi 4 an hunga, a ni hni niin mi 8, a ni thum ni chenin mi 10. Voisûn hin chu mi 27 an tling phâk tah. Naupang hai group pathumin kan thre a. Group #1: ABC la hrie lo le ziek dân la hrie lo hai. Anni hi Pu Pramod hai monu, Pi Neetu kutah kan sie a. Pramod nau-pa Tv Abhishek in a thrangpui bok a. Group no. #2: ABC ziek thei tah, ana-chu line vêl la zui thra thei lo hai. Alphabets a inthoka thil hming hai dam inchûktir an nih. Chun Maths - addition, subtraction, multiplication tables hai khom thawpui ding ti a nih. Group #3: Class lo insang deu ta hai (Class V le a chungtieng), English le Maths thawpui mêk an nih. Group #2 le #3 hai hi keiin ka thawpuia, thrangpui ka trûl ang peiin Tv Abhishek in a mi thrangpui hlak.

5.Music Class: Tleirawl pakhat, Aditya ti a uma tu hma deu khan ka room ah guitar per ka'n chûktir hlaka. Zântieng dân 4:00 - 5:00 pm hin kan thaw hlak. Iemani chen a inthok khan a hung zom ta nawh. Biekin building ah Music class khom Pathien

Luka 5:4-6 ...Simon kuomah, “Li inthûkna tieng pan unla, nga man dingin in lèn dêng ro” a ta. Simon chun, “Houtupa, inrimtakin zânkhawvâr kan dênga chu kan hlawsam dèr a nih. Amiruokchu, i thuin lèn chu hang dêng nawk kan ti a ta. An hang dêng chun nga an inkhum t̃eu a, anlênhai chun dier loin an tan t̃ep a.

Li inthûkna tieng pan unla, nga man dingin in lèn dêng ro ti hi ei zuk hril nuom pakhat chu a ni a. Simon hai kuomah li inthûk tieng pan a, an lèn dêng dinga direction pek an nih. Iengleia li inthûkna tieng kher a lèn dêng dinga direction pek an ni a? A san ding awm chu khawvar hnung hin li inthûknawna lai nga an tam ngai naw a, nga lien fak/ tlaih khop an um ngai bok nawh. Nga tam tak le tlaih khop man ding chun li inthûkna tieng pan a t̃ul hlak ding chu a nih. Amiruokchu, li inthûkna tieng pan hi sawl um tak ani a, rinumna le harsatna tam tak nêrthlêng ding a lo um tei hlak a, nel um lo le tritumna hmun tam tak nerthleng ding um ngei bok a tih. Ringtu tam tak hi li inthûkna tieng pan pei / ngam ei um tawl ngai meu naw a. Ei lèn dêng nuom na hmun (li inthûknawna) hai ah hin rinumna, harsatna le t̃itumna um lo na hmun a ni nuom hlak vieu. An hawina hmun chen char a Isu hnungzui hi a awlsam em em. Amiruokchu, an hawina hmun chen char a hin fak ding a lo tam ta ngai si nawh. An hawina hmun a hin fak khop hmu ding khom a lo um ngai bok nawh. Ringtuhaiin hringnun hninghnar tak ei nei / hmang theina ding chun li inthûkna tieng pan a, rinumna, harsatna le t̃itumna tamtak fethleng a lo t̃ul hlak ding chu a nih. Rinumna, harsatna le triumna kheltieng ramah hi khop le tlaih taka fak ding malsawmna tam na ram chu a lo ni si a. Ringtuhai hi li inthûkna tieng pana ei len hai dinga thupek ei nih.

I thu in hang deng nawk kan tih ti hi ei hril nuom nawk chu a nih. Hi lai thu hi a va t̃ha char char ngei de maw! Simon hai hin theitawp suoin zankhawvar inrim takin nga man dingin lèn an deng a. Amiruokchu, an hlawsam der chu a ni a. Inrimtaka zankhawvar lèn an deng hnung, an beiseina popo a bo der hnung khom in, I thu in hang deng nawk kan tih an la zuk ti el theina hi a ropui tak zet a nih. Thuawina hi malsawmna hnar a lo ni tak meu el. Isu thupek ang taka lèn an deng chun nga tam tak el an inhkûm thu ei hmuh. Ringtuhai khom inrimtaka hringnun ei hmang hnung khoma hlawsamna ei tuok rop hlak hitie maw! Amiruokchu, hieng ang ngirhmun ei tuok chang khom beidong el ding ei ni nawh. Beiseina thar mi siem pek hlak tu Pathien neitu hai ei ni si a. Pathien hin a nauhai mawlsawmna tam lem ei dong(*Phek 15na ah tiem zawm rawh*)

TITANIC LE A SEVÊLA LAWNG PATHUM

~Dr. Dony Tuolte

1 THESASONIKA 5 : 1-3

Amiruokchu, unauhai, a hun le a ni kawng thu hrim ziekpêk in ngai naw a. Lalpa Ni chu zâna inru angin a hung tlung ding a ni ti nangni ngeiin chiengtakin in hriet si a. “Muongna le himna,” tia an hril lai takin nuhmei nauhase angin karlovin an chung a boh mangna hung tlung a tih, pumpel naw tawp an tih.

(Titanic lawng chung chang: Mihriem 3000 laiin kum thum zên zâwn an buoipui hnungin Titanic lawng an zo thei hrâm. 10th April, 1912 hin New York, USA pan din Southampton, England a suoksan a. Mihriem 2200 an chuong a. Titanic hin 15th April, 1912 zanril 2: 20 AM vêlin Vûrkhal (Iceberg) North Atlantic tuipui a baw fûk leiin a sie tah a. Sanhimna lawng tlâwmte chau an nei leiin mihriem 2200 po laka nuhmei le naupang 700 vêl sanhim an nih. Mipui 1500 chu Atlantic Tuipui ft 13,000 lâia inthûk lirilah Titanic hin a pilpui tah.)

Titanic lawng pil chanchin ei hriet deu fur ka ring. A film ei en châng lungmila a thar nâwk hlak. Khawvel historya bo nawk ta lo ding hriet hlaw a tling. Titanic chanchin hi kawng dang danga sui thei a nih. Ziek mi ta ding khawma ziek dân ki tam tak a um. Titanic lawng le inzawma a hun laia thil tlung ka suklang nuom a. A sui nuomhai lo sui zawm dingin aw!

Titanic lawng kha lien deu, tha taka siem a nih. Lawng siemtu khawma ropui a ti luotin Pathien khawma

sukse thei naw nih a ti hiel. Chuonga a uongpui le suong chu a vawikhat inzin suokin Atlantic tuipua vurtlang a baw fûk a. Chatuona tho nâwk ta lo din tuipui mawnga a pil ruoi ruoi el tah. Titanic Lawng sêvêlah lawng pathum an um. Chuhai chanchin tlawmin sui ei tih.

1. Lawng pakhatna chu Sampson a nih. Sampson le Titanic lawng inkâr hi 7 kilometers vel a nih. Râla inthawk Titanic lawngin siet a tuok ding inchikna, mei var an hmu. Lawngpu chu dânin a phal lo nga manin a buoi hle. A nga man mîn an hriet a nuom nawa, dân loa nga a man chu mi hriet an lau bawk. Chuleiin Titanic lawng kha hmu naw sak sak thawin a ngaisak lêm nawh. Titanic lawng fe nawna tieng an her liem san

Sampson lawng hin inchuk ding thatak a mi pêk. Niitina ei fâk zawngna a ei buoi thei. Beidawn ga thangpui ngaihai ta din hun ei nei nawh. Ei insûng khawm ei enkawl t'ha hman nawh. thenkhat chu hlêprûk le thil tha lo, Pathien thu le inmil lo, sawrkar phal lo, thil khap hnawtin ei



ka puong a, tlawm tete an hung pêk khawm diet diet a, chêng Rs.1370 kan hmu a nih. Sum pêkna konga hin chu kohra det kan la ninaw leiin a la har-sa met ding a hoi. Sawma pakhat hai khom an pêk hlaka, sienkhom regular deua pe hi an tam nawh. Lalpan sum pêk suokna konga khom hmatieng hunah pêk nuomna lungril an nei tir pei ei beisei. Biekin sukfaina sin hi Pi Nemshree in a thaw hlaka, a trûl ang peiin ka san ve hlak. Chun inkhawm trîna refreshment (fâk le dawn) ding hai khom ka buoipui hlak bok. Hieng hai hi Sunday inkhawmnaa ka rong-bawl dân tlângpui chu an nih.

2. House Visit: House visit Evan Pramod leh kan nei hlaka. Chu taka chun hun hong trongtraina le in-neituhai trongtrai pêkna dam ka nei hlak. In kanna hi kohran member-hai in a ni hlaka, a hran a mi dang a inthokin fielna dong a ni naw chun. In kam sir châng hin chu thu hril vêl ka ta dingin a la remchâng nawh. Asanchu hieng lai hmuna an culture dâm, inneituhai khawsak dân, an lungril (mentality) le thil dang dang hriet trûl a um hlaka. Nuom el a hril thei a ni nawh. Pu Pramod in a'n hohlimpui hmasa phot hlaka, lungrilin an buotsai zinga thu thra tak tak a hung thur suok hlak. Bible châng a thlanghai a remchâng ang peiin ka tiem pêk hlak. House visit nei chu a thlum chi dawn a trûl hlaka, thingpui thlum al khom ka du chi ni naw sienlakhom inhnik

deuin ka dawn hlak. Pathien zârin fâk le dawn a hin chu ka buoi ngai naw leiin inhnik rak naw sienkhom hrisêl-nan a thawhla ding a ni ngat naw chun ka hnaw! ngai nawh.

Birthday lawmnaa hai khom trongtrai pêkna hun kan hman hlak. Trumkhat chu Pu Pramod a um remchâng naw leiin nupa inhuolna program an neina hmun pakhat Pu Pramod naupa Tv Abhishek leh kan hang fe a. Moneitu ding pa lu chun-gah kut kan inngat a, kan trongtrai pêk. Chêng Rs.100 ve ven an mi pêk a, chun bu khom an mi'n fâktir bok.

Evan Pramod le in kanna kan neia inthok hin thil tam tak ka'n chûk dok nghe nghe boka ka lawm hle a nih. July 14, 2023 zântieng khan meithai pakhat, Pi Suman kan va sir a. Ama hi Hindu nisienla khom Pathien thu hriet nuomna a nei leiin kan lo kan ta hlak a, ei mission biekinah khom a hung inkhawm ve ta hlak. A lawipuiin netui a nei naw leiin a lunginzîng a. Asanchu Hindu hai ring dân chun an ran nenetui sawr dok hmasa tak chu an pathienhai kuomah an inhlân naw chun thil thra lo a um thei ti hi a na. Chu chu a thaw naw leia um ni tâng a tih ti a ring vâng vâng leiin Pu Pramod kuomah thil umdân a lo intlun kha a nih. Pu Pramod in thuhrlina tawifel tak a nei zo hnungin lawi inah kan va fea, lawi chungah kut kan inngata kan trongtrai tah a. July 16 niin Sunday Worship Service ah testimony

SHIKOHABAD MISSION FIELD REPORT

~Pauzaman

July 27, 2023



Hmar Christian Fellowship Delhi a ka rongbawlpui, thruoitu inzaum tak tak hai le kohran mipuihai, in rengin ei Lalpa Isu Krista hmingin chibai ka hung bûk cheu.

Pathien lunginsietna le ditsakna zârin Shikohabad, Firozabad, Uttar Pradesh a ei mission field chu May 04, 2023 a inthok khan ka lo um tran tah a. Umna ding quarter vêl la remchàng naw sienlakhom umna ding thra tak el, Evan Pramod hai inchungah a hluoman thlatin Rs.1800 le electric fee (Rs.7/ unit) pein ka um tran a. Kohranhai mi trongtrai pêkna hai le Pathien huolhimna zârin ka hrisêlna khom a thra hle a nih. A hrana fâk le dawn siem loin Pu Pramod hai sêngkuo leh inlaichîna siemna malam dingin tiin an suong suong ka fâk hlak. Thlatina fâk man ding pêk ka tum chu an lâk nuom naw leiin thlai suongna dinga mamaw hai, tui dawn, etc hai chu a trûl ang peiin ka thaw hlak. Mimal harsatna voisûn chenin ka nei hranpa chuong nawh, electric mumal naw leia lum tuor ti naw chu.

Shikohabad a ka um tîr a inthoka rong ka bawl dân tângpuihai hung târlang ka tih:

1. Sunday Worship Service:

Kohran member-hai hi kêr khat hun sêng sinthaw an ni leiin Sunday ti naw chu inkhawmna hun remchàng a la um thei nawh. Dâr 10:00 AM hi inkhawm hunbi chu a ni a. Amiruokchu dar 10:30 AM khom hin kan la tran hman ngai naw chu a ni deu tak. Biekin discipline ti hai hi chu inhrilhriet a lan tak met ding a nih. Inkhawm dinga an hung pungkawm lui lui a hin lungawi takin mi tin ei la lawmlut phot a nih. Thuhrlina hun hai, thawlawm inhlânna dâm, chun inkhawm trîna mihai trongtrai pêkna dâm ka nei hlak. Vai trongin hnesaw deuin ka la

hril thei naw bok, ei trong lamdan vêl hriet a lan tak chu ka ring, chun hien-glai hmuna local vaihai trong dân hi a danglam deua. Chuleiin Pu Pramod in thu hrilna amani, thu puongna amani ka nei zo hin mipui hai lai a mi summarized pêk hlak. Worship team hai ka thawpui hlak bok a. An tlangvâlhai hi sinthaw a inhlawin hmun dangah an um tawl leiin inkhawmnaah hmu ding an um ngai nawh. Praise & Worship chu nunghâk ruol le naupang ruol leh hla thlûk inkat nei nuoiin nisienlakhom inhoi deuin kan thaw hlak. Inrinnia hla hai lo thlangfela trongtraina hun hai biekinah nei thra kan ti tâng a, chu chu kan thaw tran ta bok. Guitar le congo inchawkna dingin nei zât zât dêng khawm dingin kohran lai

HREPUITU

buoi. Ei thil thaw mi hriet ei inlau a, an mi man dawk ding ei ti. Mani ei dama ei khawp leh lung ei suk awi. thangpui ngai ei sawmdawl pei naw a, an beidawng rawl ei uksak bawk nawh.

Thlarau khawvela din inchûk ding a tam. Christien nun ei hmang dan leh hmetbela hmetkawp thei a tam. Sandamna hmu loa muol liem ding kawthler, lam lien le khawlâi dungah ei hmu rawp. Sienkhawm ei sin thawna, fâk ei zawng le Pathien be dinga Biekina fe din ei buoi. Ei uksak tum naw a, mit sir khawmin ei en hman nawh. Chubaka suol ei thaw mi hriet ei inlau leiin ei khek dawk ngam nawh. Pathien thu ei hriet hai ei topui a, ei pumbil lem hlak.

Kohrana thuoitu le hotu, a lukhâi ni leh le mipui tuel khawm ei him bik nawh. Khawlâi dunga zu rui, drug addict le inrui thei thaw, piengthar lo ei hriet kawthler le lamliena ei hmu châng ei fe pêl hlak. San ngai, thangpui an ngai hre zingin ei en liem zung zung. Samari Mi tha hmu ding ei um naw ning a tih. Hmangaia min tlantu Pathienin ieng tin am ngai a ta?

Hiengang mi hai mihriem chun misuol, tirdakum le thil tha lo thaw ei tih. Andik ngei. Sienkhawm nang le keiin ei hril naw chun tuin hril an ta? Tui am sansuok a ta? Khawvelah Isu a lêng lai misuol ina a lut. Damna thu a hril pei. Hlêprua ngai Zakai inah Isu a tung. Samari nuhmei an biekpua, dâwn ding tui a ngên. Nuhmei uire a kuomah an hung thuoit. Ei ni chu ei tha

HREPUITU

tawl, misuol hai ang ei ni ve nawh. An ni angin a lang a changin ei suol dal thei. Chuleiin ei hnâi nuom naw a, ei râl thlier lem. An ning ninga um din ei en liem hlak.

Hmangaina mit-in ei hmu naw leiin ei nuna inchûk le hmu ding an nei nawh. An mi ral thlira, ei ni hlakin ei ral thlir. Chuleiin Pathien chawibiek dinga fe an inzak a, an inthlahrung hlak. Nang le kei hlaka fiel ei tum nawh. Suolin a zema, a nuom dânin a t huoi kawi hlak. Thangpuia santu ding an nei nawh. Mani an insan dawk thei si nawh. Titanic lawngin tuipei tuong nghâk dinga a pil ruoi ruoi angin a tawpa suolin chatuon hremhmuna a pil pui hlak.

2. Lawng pahna chu Californian a nih. Hi lawng hi Titanic lawnga inthawk 14 kms a hlaah a um. Lawng hi Vûrin an huol khum vawng. Lawngpu chu a dak suok a. Titanic lawnga danger sign chu a hmu. Titanic lawngin siet a tuok ding a hriet annawm. Sienkhawm zân lungzing leh an thim baw. Tho daw a, va san chu remchanga a hriet naw leiin a zâl nawk a. Zing khuovara a thara ngaituo din a sie ta a. Lawngpu chu ama inhnêm fawmin ieng khawm tung naw nih ti'n lungmuong deuin a zal nawk a.

Hieng ang hin samdam ngaia khêk rawng rawng ei hmu rawp. Santu ngaia an khek rawl ei inhmai rawp. Khawvelin sietna rapthlâk a hmasuon, a tuok ding ei hriet. Amiruokchu mani in lum ei thlâkhlaa, harsatna mi huol

khum dâm ei suonlam. Hun a la um, ni dang leh, hun thara ngaituo din ei sie hre hlak. Hriet naw tehlem insirin ei tosan. Sienkhawm hun le niha'n an mi nghâk si nawh. Ei inring hmân siet-na'n a mi chimpil hlak. Californian lawngpu, zing khuo var nghâk khan aw! Thaw ding a nei ta le. Zingkhua a var tikin Titanic lawng kha tuipuia a lo pil dêr tah.

Californian lawng a inthawk inchuk ding ei nei ka ring. Ieng khawm ka thaw thei nawh, tângkaina ka nei nawk ti'n mani ei inhnêm fawm. Ei thabo leiin suonlam ei siem. Chu nekin iem thaw thei ka neia tiin dak suok ei tiu. Dak fân ei tiu. Thina kut deiin a man, thi nghâka thim hnuoia t' hung tam tak an um. Santu ngaiin an khêk. Mi san ro tia khêk rawl ei hriet hai, uksak loin ei ngaitha zing ding maw! Californian lawngpu anga zing khawvar ei nghak sùng, sandamna chang loin tam tak hremhmun tieng an liem pei.

Thina thim hnuoi t'hungin, Mipui sang tam an bohman, Sandamna aw! Sandamna nei lo in; Hringna lampui inhmangin, Thingbul lungbul an biek a, Eini anga intlansa an nih

Sang tam thim hnuoia t'hung, thi ding nghâkin an um. Sansuok ngaiin an inrûm. Sienkhawm ei thabo lei, mani hmasiel lei damin hun ei inkhelpui. Na kie, zingah leh ti'n hun t'ha ei suk hmang thai. Sandamna thu hril loin, hun t'ha ei khawral. Sienkhawm

hun hi tui angin a liem zing. Nghâk nei loin an liem pei. Nang le keiin ei thaw naw leiin thina'n sang tam nitin hremhmun tieng a t'huoi.

Tam tak hlak chu sandamna camp khera piengthar ei tum. Camp thaw pha leh tiin hun t'ha ei inkhelpui. Sienkhawm hun hin a mi nghâk nawh. Camp nghaka hun ei inkhelpui sung chatuon khuo a var el thei. Sandamna thu ei ngaisak naw chun hun t'ha nei zing ei tih ti thei ei um nawh. Tui luong angin hun hi second, minute le dârkâr tinin ko kir lo din a liem pei. Sandamna thu ngaisak nuom loa ei um zing chun inring lawk loa Titanic lawngin siet a tuok angin siet ei tuok rup thei. Chu pha chun sandamna hmu loin, kir nawk lo din chatuon hremhmun tieng ami her liem ding a nih.

3. Lawng pathumna chu Carpathians lawng a nih. Hi lawng hi sim tieng panin an tâwl. Titanic lawng le an inkâr chu 58 kilometres a nih. An kâr hla hle sien khawm Titanic lawnga chuonghai thlaphâng khêkri le an t'ap râwl radioa inthawk an lo hriet. Chuphingleh lawngpu chu Pathien kuomah dingthathuona tawngtaiin thaw dan ding, direction pe din a t'ulût a. Lawng an lamlêt tir nghâl. Hrât deuin vur dei lai Titanic lawng san dingin a tlan phei a. Capathians lawng hin Titanic lawng pil ding chu a va t'hangpui a. Lawnga chuong mihriem 700 vel sanhim an nih. Hiengang mi hi khawvelin a mamaw a nih.

Carpathians lawngpu ang hin

chun Pathien kuomah a trongtraina hla an zawt a, donna ruok chu a damsungin a hmu hman nawh.

Iengkim ei tuokhaia a hin a tawpna chu hlimna le lawmna'n tawp hlak sien ei nuom a, ana chu tak ram chu a dang a lo nih. Ei trawngtraina khom damsunga donin a um dal thei, amiruok el chu zawlnei Jeremia ang in Pathien ringsannin, Ama bel tlatin ei trawngtraï hlak ding ani. **Ringtuhai**

hin harsatna le lungngaina hmunah Pathien ei bel hlak ding a nih.

Jeremia trawngtraina hi ei trawngtraina ni sien la nuom a um ngei. Lalpan mi siemthar sienla, A kuomah mi thruoi kir sienla, tiena ei hlim lai ni ang khan Ama hlim takin be in chawimawi tlang nawk inla nuom a um ngei de! Lalpan ei harsat tuorna hmangin mi tuoithar seng raw se.

(Editorial sunzawmna)

theina ding hin hlawsamna khelah rem ami lo ruot pek pei hlak si. A remruot ang taka Lalpa i thu in hang deng nawk ka ti zuk theina ku hi malsawmna hnar chu a lo nih. Amiruokchu, a malsawmna tam lem dong ding chun thu awi taka li inthûkna tieng rinumna, harsatna le t'itumna tam tak nerthleng a lo t'ul hlak si. Pathien direction hi ei ngai poimaw ding tak chu a nih. A direction zui ding chun thuawina chau naw chu lampui dang a um si nawh. Mihriemna ramah hlawsam der hlakin le ei beiseina bo vong khel ramah hin khop le t'laih taka chên ding malsawmna tam tak a lo la um hlak chu a ni si

a. Ama thu thua zuk inngat tawp el hi malsawmna hnar chu a lo ni si. Beidong chang tam hlak de sienlakhom, Lapa i thu ang takin li inthûkna tieng pan in lèn zuk deng nawk ka tih zuk ti theina hi malsawmna hnar chu a lo ni tlat si a.

Unauhai, khop le t'laih taka chên tham malsawmna ei dawng theina dingin li inthûkna tieng pan a, ei lèn hai deng dingin in siem ei tiu a. Ei hnuoi beiseina hai lo bo hlak de sienkhom, Lalpa i thu ang takin ni rawse ti a zawm nghal thei dingin ei lungril hai zuk siem thar sau sau bok ei tiu aw le!

hi Bible chang a'nthawk hin ka hriet suok a, Lalpa mi vengtu le mi thrang-puitu kuoma lawmthu ka hril mol mol ta a nih. Bohmang loa ei um el hi, Lalpa zangaina lei lieu lieu a ni a, Pathien a ringumna lei a nih. Hallelu-jah! Ieng chen am ei lan do pei ding ei hriet nawh. Lalpan hmelma hai kutah hun sawt tak min tuor tir ati ti kan lau ngei! Tuor laitak hi a harsa ngei maw? Harsatna ei tuokna hi thlawn naw sien, thlarau malsawmna tamtak, thienghlimna dam, zaidawtheina dam, hman-gaina dam, hrietthiemna dam dong seng in la nuom a um. Pathien mizie Jeremia'n a puong, lungngaina intlun sien khom, mihriemhai kumkhuoin a pei thlak ngai nawh. Pathien chun lain-atna an entir nawk hlak. A hmangaina a ropui a, iengtik lai khom a re ngai nawh ati hai hin thlamuongna lientak ami pek chu te! Pathien hmangaina chu a chuoi ngai naw a, a lunginsietna leiin ei bo hmang a phal naw a. Hnena chang a ei ngirsuokna ding lampui a mi siempek hlak. Lalpan a hmangaihai a zil hlak a, harsatnahai ei ta ding a thil thrain an'changtir lem hlak. Ringtu-hai ta ding chun, harsatna hi a tawpna an naw a, an tranna, hnena ei chang ngeina ding a ni lem hlak. Harsatna ei tuor hun lai khom, Lalpa chu amihai kuomah a um zing hlak a nih.

Lusun Hla bung 4 a hin Jeremia'n Juda hai lo ropuizie le tuta an ngirhmun a tekhi a. Zion nauhai chu rangkachak anga lo hlu ni hai sien khon, tun chu pil bel ang chau an ni

ta thu a hril a. Du du fa hlak lo ni hai sienkhom, tu'n chu tramin an thi tawl ta a. Lal nau um awlhai khom tu hin chu an dum ral el tah a nih. Jeremia chun kawlnhnama thihai chu tram leia thihai nek chun an hamthra a ti a. Hmangaina a lo sip nuhai khom chun an nauhai an fak el ta a. Lalpa lungsenna chu bun thlak in a um a, Judahai chu hnotdar le, sala thruoiin an um a. Lalpa Pathien chun a suokhai, a rongbawltu, zawlnei tam tak an lo thathai phuba a lak a nih.

Lusun Hla bung 5 na a hin zawlnei Jeremia chu Pathien tieng ng-hain a lunginsietna a ngen ta a. A mi-hai tuorna Pathien kuomah inthlunin a trongtrai a. Chang 1-2 a chun, **"Kan chung a thil tlunghai hi, aw Lalpa hung hre zing rawh. En ta, kan mulphozie hi! Kan rochung kan ram hluohai, hnam dangin an nei zo tah, kan inhai khom hmel hriet loin."** a lo ti a nih. Jeremia chun an in le lo hmelmahai kuta an chan hai po po, Pa neilo hai, Meithe i hai, an nuhmei, nunghak hai hmelmahai soisaka an um le, an thruoituhai iengma loa an tha-thai, tar le naupanghai tuorna, iengkim Pathien kuomah trap pumin a'ntlun ta a nih.

Chang 21-22 a chun Jeremia'n indinthar annina dingin a trongtrai a, "Lalpa nangin mi siem tharin I kuomah mi thruoi kir rawh. Tiena kan hlim lai ni ang khan. Nangin mi tuoithar nawk rawh." Pathien donna hmuthei inlang um der loin Lusun Hla chu a tawp a nih. Beiseina nei tak pumin Jeremia

nang le kei khawma suolin a khardan sangtam thina hlim ruoma thung hai sanhimin ei sansuok thei. Khawvel tuipua ei inzin lai ei kaw l le kiengah suol bawia intang, suol khardan sun-ga intang ei hmu hlak. Anni sansuok dingin iem thaw veng ei ta! Carpathians lawng ang hin bohman g m êk sansuok din ei kut le ke sukhrat ei tiu. Thlarau bohman g sansuok hi nang le keia chungah an ngat. Setan kulthima intang, thlarau bohman g sansuok din hma lang ei tiu.

Bohmanghai, suol khardana intang, sansuoka min tlan din Isu a hung. Bohmanghai zawnga sandam dingin mihriem naupa a hung. Van hmun ropua van mipuihaiin A thienghlim, a thienghlim! tia an chawimawi chu thlâkhla thei loin Isu'n a mi hung zawng. Suola pil tah, suol thuneina hn-uoi a intang min tlan suok din van lal nau hnuoi tawngsephurah a hung.

Vawisun chen Pathienin hman-gaina rawlin a mi ko. Ei umna hmuna inthawk Isu pan ei tiu. Titanic lawnga chuongha'n hre lawk lo, inring lâwk um der loa tâwk-le-khata siet an tuok rup angin khawvelin sietna rapthlak la tuok a tih. Chu pha chun sandam nuom inla khawm, hun um ta naw nih. Lungsietna hun bo tang a tih. Nang le keia ta din sandamna hun um ta naw nih. Chuleiin sandamna hun t̃ha e nei sung, sandama ei um theina din Isu ring ei tiu. Sandamna lawnga chuong din inpuocha sup sup ei tiu. A lampui umsun Isu a nih.

ZEFANIA 1 : 14

LALPA ni ropui a hnai ta a,
A hnâi ta hle a, tlung vak a tih.
Ngai ro! LALPA nia t̃ap ri chu,
Nasa takin inring a ta,
Mi huoisenhai chen khêk an tih.

Lalpa'n mal misawm pek raw seh. Amen.

Sawmapakhat le Good Samaritan Fund

Online a Sawmapakhat le thilpek dang dang: Sawmapakhat le thilpek dang dang pe nuom hai chun hi a hnuoi a Hmar Christian Fellowship, Delhi account detail a hin pek thei zing a nih:

Account Number : 91462010038313

IFSC Code : CNRB0019146

Bank Address : Syndicate Bank/Canara Bank, Akbar Bhawan, Ministry of External Affairs Branch, Delhi-110021.

Online baka hin ei chawibiek naa thilpek ei lakkawm huna khawm thilpek dang danghai hih ei pek thei zing a nih. Sawmapakhat le Missionary Fund hi Finance Secretary (Mission), Pu Immanuel Khawbung kuoma lut/pek ding a nih.

Good Samaritan Fund: Chawibiek naah thilpek lak khawm huna pek thei a ni a, chu khela chun Finance Secretary (General), Pu Thanglalmuon Hrangchal kuoma khawm pek thei ani bawk.

KA PALAI HAI CHUNGTIENG AN UM SIA

By~ Rev. Songrolien Songate



Isai. 49:14- Nisienlakhawm Jion chun, Lalpa chun a mi mak-sana. Ka Lalpa chun ami theinghil tah a tia. Nupuiin anau nene nelai a theinghil thei dîm manih.

LUNGPUI KÂRA LILY:

Sakhuo rawngbawlina ka lutchil tîra inthok in, Lungpui kâra Lily pâr hung indawn suok ang le hlingbuk laia rose pâr hung indersuok angin, pang inhâng nengnungin bul ka tan tlat el hi Lalpa ta ka nina sukchiengtu a nih. Ka hnina a thlâwn hmasazet hlaka, tuorna le chôn nân a zui têt hlak bawk a. Tâpna ruom le lungngaina zanthim chu, ka lampui hraw dinga ka pa mi ditsakna tlung lampui a ni rawp hlak.

Innuï ri a re vawng vawng a, khâkdawma inngai rawng rawngin ka nunram tisamizie a chingzawî hlak. Laina ram a hung inlanga a tîn nawk hlak a, mihriem rama ka âiaw dinga ka beisei rûk hai an inrel hmang hlak bawk. Ka mihriem nân nuomdan ditan a nei hlak, thiek pekin ka um zat hlak si. Awlsam taka mihai paltlang ram hi, ka ta ding chun ankhaw bîk rieu el hlak a nih. Rimsikna rama hlawsuok sermon ngaia lamzawla par dêr dêr hai le, langtheirama ditsaktu anga inlang hai hmelhrietlo ka ni nâwk hlak.

THUTHLUNG LAMPUI INTUM RAWNG A UM NAWH:

Zawlnei Isai in a lo hmulâwk ram chu, BC 600 lai khan a lo khekpua. “Ei ta dingin naupang a hung pienga” ti hi a nih. A hmulâwktu kha a rimsitak chu a ni kha, Lalram hmasâwnna ding hin a hmulâwktu an rimsî pei chu ani hi. A hmupui ve lo hai chukhrawnin an

um tlangpui hlak, a mak nawh hmulo hai thawtâwk char ani hrim a nih. Hmu ei neina tak kha, Lalpa ditsakna a nia. Sawiselna le dona kha, tuorselna a min chûktirna hmun ani bawk. Pathien ram zauna kawnga hin, tumdan le nuomdan i nei zâtin hmelma inhâwrkhawm zie hlak an tih. Chu chu thuthlung zawlnei hai po po lo hraw tah lampui, ei hraw ve dinga Lalpa mi ditsakna ani ve sia. Lalpan Mary a ditsakna chu, Nauvawn (Inrâi) figure nal lo deua inlang le, mihai hmusit ding zawng takin ani sia. Lalpa ditsakna lampuia hmél ditum le ziemawi, a um ngai nawh. A hersâwra a chingzawia, Ama Lalpa hma ah bawkhup lo theilo dingin a hnebân lem hlak a nih. Ei ni hun pei ah khawm a lan dik pei a. Tisa taka sakhuona dana kalchawi mêk hai manphâk, hnawtphâk dingin ringtu chu kal anchawi tir hlak a. Kawng dang dang ah, suonlam fahra tak tak hmanga khitde le sawisakin an um hlak. Lalpa mi kona hi, khawvel in

HREPUITU

leia harsatna ei tuor ni reng sen khom Lalpa ei pan chun lungsenin a mi don ngai nawh. Iengtiklai khoma ama ei pan chun a lo lawm em em hlak. Ama ei pan chun ei tuorna a suktawi theia, a lak hmang thei bawka, annaw leh tuor zo na dinga hratna a mi pek hlak. **Ieng ang harsatna am ei nei a? Ieng tin am don ei ta?** Zawlnei Jeremia angin Pathien lawm zawngin lusun hla in zawt ei tiu. Ei lungngai beidong hla Pathien kuomah in zawt hi ei thaw ding tak a nih.

Lusun Hla bung 3 a hin Jeremia chu lo trap in inrum sien khom, hriet dok a hung nei ta tlat a, Lalpa Pathien thratzie le, zangaina le a lunginsietna le a ringumna a hung hriet suok a. Thrang dokin Pathien tieng a ngakir lem ta a nih. Vs. 22-23 a chun, **“Bohmang loa ei um el hi, Lalpa zangaina lei ana, A lunginsietna a tlol ngai nawh. A thar pei hlak tuk tinin, A ringumna a ropui si.”** Tiin. Harsat rinum nasa tak an tuok lai chun Jeremia’n Pathien a hung hriet suok a, Lalpa ringumna ah annghat ta a nih. Pathien lo thrangnaw nisien bohmang vong el ding kha anna! Jeremia chun **“Mihriemhai hi kumkhuoin Lalpan a pei thlak ngai nawh. Lungngaina intlun sien khom, lainatna a’n entir nawk hlaka, A hmangaina ropui chu, ieng lai khom a re ngai nawh.”** a hung ti tah a nih (3:31-32). Jeremia’n Lalpa ringumna le umpuina a puong zo chun harsatnan an kieng san nghal naw a. A lungril natna a la umpek zing

HREPUITU

a. Hmelma han an hung bei zing. Ana chu aw, Jeremia chun huoisen takin mipui hai chu an lampui enthra ding le, suol sim ding le Pathien kuoma kir dingin a hril a. Jeremia chun Lalpa rorelna indik tak an hmelmahai chungga tlung dingin a trawngtrai zing lem a nih.

May ni 3, 2023 ni khan Manipur, Imphal khawpui sungah buoina namen lo tlangram mi abikin ei ni zohnathlakhai chungah a hung tlung a. Ei in thra nei po po hai ni leh, ei thilnei hai po po channin, hnot hmangin ei um a, hrilhaiin, lungril na takin, ei himna ding zongin tlangram annaw le khawpui dang ei pan tawl a. Lungril hi ana em em a, ei tuornahai ei ngaia ei en chun mithli hi a luong tawp thei naw a ni tak. Kei chu thlakhat deu thaw trawngtrai theilo in ka um a. Pathien lawm zawnga lusun hla in zawt ti chu hla tak a nih. Pathienin suol hrem loin a sie ngai nawh ti kha a kum tel Bible Study Fellowship ah kan subject a ni lei khan, hmelma han **ethnic cleansing** anmi thaw lai zingin, Lalpa chun **spiritual cleansing** a mi thaw ngei a nih ti kha ka pom hmak a. Ei suolna insangzie le inthukzie ka ennin, Pathien lakah inphalamna le, inngaisietnain ka sip a. Ka trongtrai khoma, tuor ding hrim eini tiin ka trongtrai zom thei ta ngai nawh. Ni khat chu ka lungrilah, Pathien eini tienga thrang ninaw sien, Pathien lunginsiet lei ninaw sien, hmelma han zankhat thil thuin an mi lo hnuoi chimit vong ding a nizie

13

um ta nawh (1:4). Lungril ngui tak le rinum takin hnam danghai suokah an intang ta a nih (1:5). Juda lal ram chu a thlakna an sang hle. Tram nasa tak thlak leiin thiempu le upahai tramin an thi a (1:19). Pomlai nauhai khom nuhai trangah an thuok a chat a (2:12). Thleirawl thralai hai kawlnham in an thi zo a (2:21). Thiempu le zawlneihai chu Pathien tempul sungah thatin an um a (2:20), him ka tih tia an tlanlut ni mei a tih, amiruok chu Pathienin a tempul a maksan tah a lo ni lem a (2:7). Lalpa Pathien chun Israel hratna (military) a sat chat peka, hmelma han an hung run chun A kut a keikir tah a nih (2:3). Pathien hin a ti ang angin thil a thaw hlaka, suolna leia hremna le thina hung tlung ding khom a lo hril lawk ang charin a thaw a nih. Pathienin indoi loin Judahai hringna chungah ro a rel a. Ei Lalpa Pathien lungsen hi tri a um ngei de! Pathienin suol hremloin a sie ngai der nawh ti a takin ei hmuh.

Lusun Hla 2:17 na ei en chun, Jeremia in Pathien hremna ngei a nih ti in a pom hmak a. Bung 2:18-19 a Jeremia donna hi thra ka va zuk ti char char. **“Aw Zion Naunu kulpui, lungrilin Lalpa ko khek ro. In mithli sun le zanin vadung angin luong raw se. Chawl loin trap zing unla, in mit insim naw raw se. Zan veng intran a’nthokin tho unla, khek tran ve ro, Lalpa hmaah in lungril tui angin bun suok unla, in nauhai hringna ta di’n, Lalpa hmaah ban phar ro, kotthler tontir ta photah**

phingtramin an thlep thla hi”. Jeremia chun a hmangaihai, a lo kei thleihai chung a Pathien hremna a tlung a hmuin a tra a nih (2:22). Mipuihai chu mithli luonga Pathien kuoma trawngtrai dingin a koa. Tuorna hmun a hin lampui pahniin ei don hlak. Lungril natna hai Pathien kuoma inthlun an naw le beiseina nei loa lungril natnahai ei saksuok hlak. Jeremia ang hin ringtu hai chun a hmasa lem hi ei thaw dan ding a nih. A chang chun, Pathien nuor san an naw leh beiseina bo der a trawngtrai pei loa um khom ol deu a nih. Jeremia ruok chun a lungngai beidong le lusun chu Pathien ditzawngin a suklang a nih. Pathien kut an tuor a nizie a chienga, a lungril natna le tuorna po po Pathien kuomah a’ntlun a. Pathien kuomah trawngtraina hun tam tak a nei a, Pathien tieng kir dingin mipui kuomah voi tam a hril a. Hi hi a nih Pathien lawm zawnga lusun hla in zawt chuh.

Hi khawvela hin harsatna chi dang dang ei tuok hlak. Tulai chu ei nuomthu ni der loin ei hrietnaw kar indonaah ei lo lut der a. Ei enna tieng tieng beidongna le natnain a sip zo. Thrangpuitu ding pakhat khawm an um nawh. **Hieng ang lungngaina hmuna hin iengtinam ei don a le?** Harsatna dang dang, natna, thina, sung le kuo inlaichina kongah harsatna, mal ngawi ngawi a ingai tlatna, nau thu awilo, kawppui ring umlo, pansak panthlang inremtheilo, chi dang dang khom, ei tuor rop hlak a nih. Ei suolna

a mi hrietpui thei dêr naw el hi thilmak ani nawh. Lalpa râwl hi anring naw em lei hin, nakawr dawlotu ta ding chun hriet antak hlak hrim a nih. Lalpa thu chu la ngîrsuok tho tho a tih, Nghak el rawh. Ama chu a to sawng âwm si naw a.

A CHÂNG HIN CHU DAWNTU NEILO ANG EL KA NIH:

Naute nene nelai chu a nu in amaksan hlak a. Nau nene ngai leia t apa inhniek fawk fawk el maksan ngam nû an um hlak. Naute ta ding chun vanpui a chim takmeu a nih. Amiruokchu, Lalnau hai tading chun a mi kotu Lalpa ah mi a chieng phawt chun, Liena kunga, Lala le Thanga hai maksan mei mei hi chu a pawî nawh.

I PALAI HAI CHUNGTIENGA UM AN NIH an nâwm. Nikhat chu ru le châng la hung inchuktuo mawl a ta, sipai ral hrat angin la ngîrsuok mawl i tih. I kawng iengkima, dâltu an um hlak ani khawma, chungtienga palai huaisen hai khin i lampui lan thiel-fai em em an tih. Kohran ram ropui rêlna hmun khawm, ei palai hai chu chungtienga um an nisias, chuleiin an-râwl nghak el rawh. A kawt hawngsa chu mihriemin khar thei naw nia, a khâr ta chu tukhawma keihawng bawk naw ni hai. Ei palai hai mitmei veng hi a pawimaw tak chu a nih.

A kutpha ropui sunga hin, ami hai ta dinga himna le ralmuongna a um si a.

KRISTA LUNGPUI CHUNGA REM

~ Rev. Cliff Kawldinglien Joute

“... hi lungpui chung a hin ka kohranhai rem ka ta, mithi kawt-khârhai chun chu chu ngam naw ni hai” (Mat. 16:18)



Kum 2020 ânthawk khan Covid-19 hriin khawvêl pumpui a chîmbuoi zêk hnungin le, rawngbâwlnaa hma thar ei hang pût nâwk sau sau lai zingin Manipur rama ei unauhai chu buoi namên lovin tuhin a tlâkbuok a. Manipur ram le ei unauhai ngîrhmun chu hril ngai lovin ei hriet seng leiin inzâwt tam ngai lovin tawngtaipui mawl mawl zing lem ei tiu.

Khawvêl mi chun Kohran chun Biekin (Church building) a ngai leiin sukbohman tum in a rawsiet in le suosam hlak a; Kohran nina le umzie a hriet naw hle a nih. Kohran chu Biekin (Church building) le a kona pâwl (organization) hming mawi tak taka in-bûk hi an nawh.

Kohran chu thurûk inthup ropuitak leilung insieng hma dai a Pathien remruotna le a ruotlâwkna a in an a nih. Kohran ropui nâwk zuolna chu Pathien mi pathum haiin chanvo an nei seng a nih. A tawi zawngin Pa Pathien remruotna in Kohran chu a hung pienga, Naupa Isu Krista feth-

lengin khawvêla indinin a hung um a, Thlarau Thienghlim thilthawtheina in pumkhata remkhâwmin a hung um ta pei a nih.

Khawvêla hmutheia Kohran hung indintu chu Isu Krista a nih. Ama ngeiin, “Hi lungpui chung a hin ka kohranhai rem ka ta, mithi kawtkhârhâi chun chu chu ngam naw ni hai” (Matt. 16:18) a tih. Isu Krista chu Kohran Lû le indintu a ni a, Isu Krista Lal le Sandamtu dinga pawmtu le ringtu chu Isu Krista taksa pênghai an nih (Eph. 1:22-23; 1 Kor. 12:12-14).

Manipur rama ringtuhai Biekin, Kohran In le pisa le mimal chêngna In hai tamtak chu suksiet, suosam le raw siet pêka an um lai zingin Isu Krista Lungpui chung a rem kohranhai (Krista taksa pênghai) hai hi ti le zâm el ding ruokchu ei ni nawh. Ei inghatna lungpui chu Isu Krista a ni si a. Chuleiin, Isu Krista Lungpui chung a innghattuhai chu an chungah thil iengk Hawthung hung tlung sienkhawm an innghatna Isu Krista an leiin an

inhnîng ve ngai nawh.

Lû le taksa chu a hran nisienkhawm, lâk hran theilo khawpa inzâwm nghet tlat a ni ang bawkin Isu Krista le Kohran chu lâk hran theilo, inzawm tlat a nih. Chuleiin, Kohran suknawnatu chu Isu Krista suknawmnatu a nih. Kohran hmusittu chu Isu Krista hmusittu a nih. Kohran suosamtu chu Isu Krista suosamtu khawm a nih.

Isu Krista chun a thisena ân tlânhai (Kohranhai) chu khawvêl in do in, sukchimit tum hlak sienkhawm an ngathna ban le lungphûm chu Pathien a ni leiin tukhawmin ngam in, hnê thei ngai naw’ng an tih. Khawvêlin Biekin chu suksie hlak sienkhawm Kohran chu Isu Krista thisena chatuona thi ta lo dinga intlân an tah leiin sukse thei chuong naw nih. Kohran chun dotu lien le hrâng tuok hlak sienlakhawm, a tâwpah Krista chu Hnêtu ni lem pei a tih.

Lalpa’n thlamuongin, umpui raw se cheu!

Damnaw threnkhat trongtraipui ding

- Pu Thangsang Varte, support ngailova a lawn theina dingin. • Pu Lalsiemlien Khawbung le Pi Rebecca Buhrl an damfel peina dingin
- Pi Siemtling Penatu, • Nk. Elish Vanrammawi, • Pu L. Thagen le • Pi Lallawmsang hai cancer anthawk Lalpa’n sukdam ngeina dingin.
- Pi Ziri Hrangate a thluoka tui um thra taka an lak suok theina dingin.

HARSATNA LE LUNGNGAINA HMUNAH PATHIEN EI BEL HLA DING A NI

~Chonghoi Inbuon

Text: Lusun Hla



“**Lalpa, Krista ah ka lungril mi veng pek rawh**” ti hi ka trongtrai rawna tak pakhat a nih. Ka lungril vengna ding hin thrang ka lak nasa hlak. Thil reng reng hi ka lungril nat le sawlna ding a ni chun ka maksan el hlak. Khawtlang chanchin khom ka hriet ding bak va zong tun tun ka thaw ngai nawh. **Anleh, lungril natna le harsatna ka pumpel thei ding?** Theilo e. Khawvêla la um eini leiin hlim ni nekin trap le lungngai ni a tam lem ti inla khel ni naw nih. Pathienin lungril na thei ding le hlim thei dinga a mi siem a ni leiin lawmnin ei lawma, harsat le lungngai mangangna hmunah ei trap hlak. Bible ei en chun ringnaa mi ropui tak tak hai Jopa, zawlnei Jeremia, Lal David le Isu ngei khom kha anlo lungngaiin an lo trap ve a nih. Voisun hin Lusun Hla, Bible a ngaisak hlaw bek lo a’nthawk hin **“Ringtu hai hin harsatna le lungngaina hmunah Pathien ei bel hlak ding a ni”** ti ei hung hril nuom chu a nih.

Lusun Hla eiti hi iem a na?

Pathienin khat le khat ei in hriet thiemna dinga thumal (words) ami pek hai hmanga lungril natnahai hril suok hi a nih. **Lusun Hla hi tu ziek am a na?** Ziektu hming ziekin lo um naw sienkhom zawlnei Jeremia in BC 586 lai vela, Jerusalem le a temple thluksiet hnunga lungril natak puma a zik ni ngei dingin ring a nih. Zawlnei tam tak chun Pathien hremna hung tlung ding an lo hril lawk a, tuor em loin muol an lo liem pei a, Jeremia ruok chu, a hrillawk bakah, Pathien hremna khom alo tuor nghe nghe a nih. Hi lekhabu chite **“Lusun Hla”** a hin hla poem a ziek panga a um a, in angna nei taka rem khawm a ni a, a bu tawpna tak ruok hi chu Jeremia trawngtraina a nih. Jerusalem kul bang, sa le nghet tak, tu khoma chim thei dinga an ring lo kha,

Babulon sipaihai hma a chun a lo chim bur el tah a. Tempul le lal ina rangkachak le thil hlu po po phur hmangin a um a, chuong chau nilo in, Juda mi fel tam tak khom sala thruoi sain an um ta a nih. Pathienin suol a hrem ngei ngei ding thu a lo hril lawk ang takin, Juda lalram a chun Pathien hremna a hung tlung tah a nih.

Bung 1 & 2 ah chun Jeremia in Jerusalem khawpui le Juda mipui hai chung a Pathien hremna hung tlung chu a tra a. Khawpui inri nuoi nuoi hlak kha rausanin, hmeithai ang el in a um ta a. Lalnu anga lo mawia ropui kha, tun chu suoknu ang el chau a hung ni tah (1:1). A ngaizawng (ramdang pathien hai) hlak chu a thlamuongtu ding an um ta nawh (1:2). Inkhawmpui laia lampui lun em em hlakhai khom a hraw ding mihriem an